



Sabtu, 11 Mei 2024
Ogen: Sepanya 1:14-18



"Wari Si Pagit"



Wari Tuhan si mbelin nggo ndeher, sada berita si ipeseh nabi Sepanya man bangsa Tuhan. Berita e i peseh nabi Sepanya lako mpersingeti bangsaNa gelah robah dengen jera erkite-kiteken dosa pelanggaren si ibahan bangsa e. Wari Tuhan i andingken Sepanya bagi wari si pagit, gelap, wari kerontasen ras kemasapen, wari si geltem dengen gelap/mbiring dengen meremang entah pe wari pernembah ate si gara; i ja serdadu si merawana pe nderkuh perban biarna. Nina Tuhan "*Kubahan **kecedaan** si bage nandangi manusia, seh maka kerina kalak **terdadap-dadap** bagi kalak pentang. Sabab nggo erdosa ia man bangKu, emaka genduari **iamburken** me darehna bagi lau janah maitna **ampar-ampar seh macik** i babo taneh*". Empat kata arah Perkataan Tuhan enda, nuduhkan maka bage me sangatna wari si pagit e me wari kerehen Tuhan. KerehenNa e ngataken maka Tuhan si sembah manusia e me Dibata si mbisa, Dibata si la erngena ate nandangi kejahatanen, Dibata si erkuasa dengen erdolat.

Wari si pagit paksa gundari enda nggo mulai teridah arah: bencana alam si la erngadi-ngadi, perang antar bangsa, antar negara bage perang antar keluarga; saling menuduh entah pe erpengakap maka diri la pernah salah, gila kuasa, nindas kalak si musil, muat hak anak-anak melumang rikut pe ras diberu balu-baluh, muat kesah kalak/munuh kalak si la ersalah. Wari si pagit e me wari kerehen Tuhan; i ja Dibata ncidahkan kinimbisanNa.

Paksa tenengta wari enda labo gelah kita mbiar jenari lit i bas kearun ate tapi gelah robah dengen jera jenari mulihken kempak Dibata. Persinget man banta kerina gelah kita jadi anak-anak Dibata si tek dengen erkemalangen man baNa. Kejadien entah pe mara sincidahken kerna wari kerehen Tuhan gelahna kita ersikap dengen metenget nandangi kerehen Tuhan. Ise pe la metehsa katawari wari si pagit rehna, tapi perlu kita tetap ersikap gelahna tupung Tuhan reh, idapetiNa kita nggeluh i bas erkiniteken.

Nggeluhlah i bas pengarapen nimai kerehen Tuhan